

Шин ирсн Эрднь

Нег дакдж, асхн шидр, „Прудовый“ гидг нертә совхозин конторин газа автомашин ирдж зогсв. Тер машин деер дүүрнъ, төрскн газран темцәд ирдж йовх хальмгуд сууцхана.

Тедн дундас, теглг нургъта, харада хар сахлта хальмг залу сахлан имрәд ясн йовдж, директорин кабинетин уудиг, барун гариннь дунд хургъар, бод-бод гидж цокад, „ордж болхий?“ — гидж сурв. Столин ца суусн совхозин директор, „ортн“ — гидж келн, мусг-мусг инәгъад, өмнәснь тосдж гаран өгв.

— Мендвт!, кедү кун ирвт?, өмәрән гарч суутн, — гигад, стул тәвдж өгв.

— Мини нерн Муушан Эрднь. Урднь, Сибирин газрт, модна урн биләв, — гив.

— Тиим болхла, йир сән, — гидж директор хәрү өгв. — Ода деерән цугъар тус-тустан ордг гермүд мана совхозд багъ. Болв, дав-деер, уутъхн болвчн багтах гермүд олхвдн. Цөн хонгт амрч авцхатн, тегәд тадн дундас, гермүд бәрх бригад бүрдәхмн. Мана совхоз зөвәр ик тәрә темснә газр эзлнә, негдгч болн хойрдгч фермд хөд, үкрмүд өсггднә, тиигхлә, кедү кун ирсн болвчн цугъаратн кәдлмш олхмн, манд кун үлүдшго!..

Удсн уга, эдниг нег герт буулгъад амрав. Уунд урднь бәәсн хальмгуд, тедниг тосад, өлг-эдинь буулгълцад, ах-дү-үгъән үзснлә әдләр байрлцхав. Өмннь эс таньдг бәәсн болвчн, ода, газртан ирәд, харгълдхларн, негл кезән-кезәнә таньдг, иньг-амрг мет

байрлдж, дәәнә кәлд темтрдж хама, ягъдж йовсан сурлцхав.

Ода ирсн газртан ямаран бәәдлтәгъәр бәәхән, ямаран кәдлмш кехән, таньгъчдан ягъдж дөнъ болхан күүндл-дәд, эрки биш гермүд бәрх бригад дундасн бүрдәхмн гидж күүндвр кегъад, шууглад, сөбни өрәл давулад суугъад оркцхав.

Өдгә цагт, эн ирсн хальмгудас бүрдсн, гермүд тосхлгъна бригад шунмгъа үзмдж-тәгъәр кәдлджәнә. Ода деерән эн бригад гер бәрх кирпичинь белдджәнә. Урднь иим кәдлмш кедж дамшад уга багъчуд, медәтирәс заавр авч, тедниг дахдж, зөрмг кевәр кәдлдж йовцхана.

— Эндр миньгън кирпич кечквдн, — гидж эдн асхнднь эк-эцкән келдж байрлцхана.

Олар хурад амрсн цаглань — Эрднь цәәлгъврин кәдлмш кенә.

— Хамдан ницәд кәдлхлә, ююна төлә кәдлджәхән медхлә, дживр ургъсн болад, чидл немгдсн болад одна — гидж эн бригадин улс келцхәнә.

Эндр кедү болв? — гидж тооч сурснд,

— Нәәмн миньгън, — гидж, сахлан ясн, мусхлздж, Эрднь хәрү өгнә. Бичә адгъ, цаачнь удлго, шин гермүд зергладж яралдх, мана совхоз сәәхн-сәәхн гермүдтә, садта балгъснд хүврх — гидж Эрднь байртагъар келәд, инәнә.

КҮНЪКРГӘ БОРИС.

Совхоз „Прудовый“.